

Danki na Jim Bello pa su 32 di aña di servicio

Awo disfrutando di un dushi pensioen

DEPARTAMENTO di Agricultura, Cría y Pesca Santa Rosa awe tabata tin e placer di bisa danki na sr. Emeterio Antonio Bello pa su 32 aña di servicio y pa su pensioen bon mereci. “Jim” ta su nomber di cariño aki na Santa Rosa. Tur hende conoce tambe bou di e nomber ey. Un persona semper cordial y cu un sonrisa semper na cara.

Un persona cu gusta su trabou di tur dia cual e ta eherce cu placer. Manehando nos trucknan di awa y ta haci entrega di awa di dam na tur nos productornan local. Un persona cu no conoce e palabra “no” den su vocabulario. Kico cu bo puntr’e of pidi’e semper cla pa yuda y realisa e trabou. “Jim” a cuminsa ta operador di Bulldozer. Tambe manehado di truck di awa pa entrega di awa di dam pa nos clientenan productor. Hasi tereno limpi pa planta cu tractor y cualkier otro trabou cu ta rekeri ekiponan pisa, semper “Jim” ta para cla pa yuda.

Sr. “Jim” Bello su carera aki na Departamento di Agricultura, Cria y Pesca, Santa Rosa a duna inicio aña 1992 dia 2 di october. Su funcion e tempo ey tabata “onderopzichter 3de klasse como chauffeur di ekiponan pisa. Funcionnan cu el a eherce ta den transcurso di añanan cual a haya e siguiente promocionnan manera 1 di november 1995 “Onderopzichter 2de Klasse, sigui pa algun aña despues dia 1 di november 2004 “Onderopzichter 1ste Klasse y dia 1 di november 2017 “Adjunct-Commies”

Despues di 32 aña di servicio aki na Santa Rosa cual su fecha oficial di pension tabata 13 di december 2024 ultimo, awe nos a invita sr. Emeterio Antonio Bello miho conoci como “Jim” pa un brindis di despedida. Tur colega di Santa Rosa a para ward’e na entrada di Santa Rosa caminda pa ultimo biaha a maneha e Dump Truck di Santa Rosa. Bou di pito di truck y aplauso nos a ricibi’e awe. Por admira tambe e potret caminda “Jim” para na e truck D-283 cual truck di awa cu semper “Jim” tabata maneha.

Sra. Nathalie Maduro director di Departamento di Agricultura, Cria y Pesca, Santa Rosa a hiba un discurso chikito contando su experiencia placentero cu “Jim” y a efectua un bunita regalo na “Jim” di parti di tur colega. Nos ta gradici tur colega cu a coopera pa e bunita gesto na “Jim”

Den representacion di minister demisionario, sr. Ursell Arends tabata presente sra. Jacky Feliciano kende a otorga un bunita plakkaat di reconocimiento pa su 32 aña di servicio y un pensioen bon mereci. Na final di tur discurso y recuerdonan inolvidabel cu “Jim” na momento di su trabou a sigui cu un brindis na su despedida di su 32 aña di servicio y pensioen cu pasaboca y bolo. Tambe el a haya un baki di fruta y berdura fresco cosecha aki mes na Santa Rosa.



Awor “Jim” por bay disfruta di su pensioen bon mereci pero corda pasa haci nos un bishita leu leu aki na Santa Rosa.

“Jim disfruta dibo pensioen”